

աթոռը իրարու ետևէ կը գրաւեն Փիլիպպոս կաթողիկոսի հետևորդներէն Մեծ Ոհան վարդապետ (Յովհաննէս Արղընցի), Տաթևի առաջնորդ Ներսէս վարդապետ և Մուղնեցի Յովհաննէս վարդապետ: Առաջին երկուքին պաշտօնավարութիւնը շատ կարճատև կ'ըլլայ, վասնզի կը ստիպուին տեղի տալ Յովհաննէս Մուղնեցիին, որ զանազան հնարքներով ինք կը գրաւէ պատրիարքական աթոռը:

Փիլիպպոս կաթողիկոս 10 ամիս և 7 օր կը մնայ Կ. Պոլիս (1652 Յունիս 19 — 1653 Ապրիլ 27): Եղիազար ի պատիւ Հոգևորտիրոջ շինել տուած էր «գեղեցիկ և մեծամեծ խուցք և տեղի նստելոյ» Սամաթիոյ Ս. Գէորգ, Ղալաթիոյ Ս. Լուսաւորիչ և Գուճապիուի Ս. Աստուածածին եկեղեցիներուն առնթեր, որոնց մէջ կարգաւ կը բնակի Հայրապետը իր Կ. Պոլիս անցուցած տասնամասեայ ժամանակաշրջանին: Այդ միջոցին իր ջանքերով ու յորդորներով կը յաջողի վճարել տալ ազգին վրայ ծանրացած 40,000 դրուշի պարտքը: Կ'աշխատի մայրաքաղաքի բնիկ ու գաղթական ազգանոց մէջէն ներսեցիի ու դրսեցիի խտրը վերցընել: Ս. Նիկողայոս եկեղեցիին մէջ իր հետևորդ յիշեալ վարդապետներուն (Ոհան, Ներսէս, Յովհաննէս Մուղնեցի) վարդապետական իշխանութեան գաւազան կու տայ: Ս. Հրեշտակապետի մէջ Պուղտանցի եպիսկոպոս մը կը ձեռնադրէ: Մեծ Ոհան վարդապետը օրհնութեան կոնդակով Լեհաստան կ'ուղարկէ: Նաև 1653 Փետրուար 6ին կը պատարագէ Ս. Նիկողայոսի մէջ և Ողջոյնի ատեն միւսուրիս կը կատարէ, այսինքն միւսոն կը բաշխէ Ս. Աստուածածնի, Ս. Նիկողայոսի և Ս. Սարգսի եկեղեցիներուն արծաթէ ամաններով, զորս բռնած ունէին Նոյն եկեղեցեաց աւագերէցները, որոնցմէ Ս. Սարգսի աւագերէցն էր Երեմիայի Հայրը Տէր Մարտիրոս: Զատիկի օրը (1653 Ապրիլ 10) ներկայ